

man mitt erdt vnd kieß zü/wañ aber das gstein des hangendens vnd ligendēs/
 iez vest/iez lindt/vnnd zü gleich der gang/so schlecht man keine iöcher/sonder
 es werden allein pfüllbeume gesetzt / vnd wo das gstein lindt ist vnnd der gang
 schnettig/so setzende die zimerleut zü ruck bretter / zwüschē welchen sie in den
 berg erden vnd kieß füllen/das sie zü gleicher weiß/das lähz ist/auf füllend. A
 ber so ein schacht der sehr tieff ist/oder seiger gericht oder ins gehēg/ mitt jocher
 vnderstützet wirt/als dan dieweil zum zeiten böse matery ist/vñ fall vorhanden
 seindt/damitt es stercker werdt/so setz man zwüschē jnen drey oder vier par 8
 lengsten pfülbeumen/von ein anderē/eines jeden bars auff diese seiten/die da ist
 gegen dem hangenden/das ander das gegen über ligt/welchs gegen dem ligen
 den ist. Das aber nicht eins ins ander fellt/vnd sie vest vnd bstendig/so werden
 sie mitt viel rigell erhalten/vnd das dise dester vester in sie gschlossen werden/so
 seindt deren wandrütten in der mitte außgehauwen. Es seye aber der schacht
 wie er wölle/so setzen sie etliche drumhölzer auff die pfülbeume/an welche sie
 bretter schlagen/welche die farten von dem anderē teill absünderen. Wañ aber
 sehr ein tieffer schacht seiger gericht ist/so schlecht man bretter/an die pfülbeum
 bey seits/damitt die leut wañ sie mitt hinauff vnd abfaren müdt werden/sitzli
 cken oder ständtlicken rüwen mögenn. Das aber dem anschlaher vom gstein/
 welche so sie auß dem tieffen schacht gezogen/widerumb hineinfallen/kein ge
 far züstande/so legt man schußbeume auff die stäge / das also die ganzen wei
 te des schachts einnymet / allein dis teill außgenömen/da die farten seindt. A
 ber doch ist auch ein loch des gebeuws bey dem ligenden / das darumb zü allem
 teil des schachts von vnden auch offen ist/das die vaf so mitt den außgehauw
 nen dingen gefüllet durch dasselbig mitt hasplē auß dem schacht herauß
 gezogen mögen werden/vnd widerumb die lähze faß hinun
 der glassen. Derhalben die anschlaher/vnd andere
 arbeiter so vnd solchen gebeuw ligendt/
 seindt im schacht ganz sicher.

h 2 Tragstempffell